

**Declaración de Valdeavellano de Tera pa
la reconocencia y defensa de los Usos
Comunales y las ICCA n'Hespaña**



Declaración de Valdeavellano de Tera pa la reconocencia y defensa de los Usos Comunales y las ICCA n'Hespaña

Los abaixu robrantes, nel marcu l'asamblea del icca consortium, celledrada en Valdeavellano de Tera, provincia de Soria, n'outubre y 4-5, 2013, y teniendo en cuenta los alcuerdos algamaos na xuntanza específica destinada a costituyire'l grupu de trabayu “**Ñiciativa comunales: Ñiciativa pa la reconocencia las áreas caltenidas pur comunidaes llocales**” pa promovere l'estudiu, defensa y reconocencia de las **áreas caltenidas pur comunidaes llocales (ICCA)** n'Hespaña, **declaramos:**

1.- Que los **usos comunales y los sous bienes y dreichos asociaos** facen parte del Patrimoñu Cultural (incluyú l'Inmaterial), Ambiental y Sociu-económicu d'Hespaña. Que los usos comunales (pesca, praos, caza, usos forestales, regadíos y outros), tien síu clave tantu pa la supervivencia sociu-económica del meyu rural y de la sociedad hespañola en xeneral cumu pa la proteición ya integración d'aquiellos grupos sociales y territorios más esfavorecíos, asina cumu pa la xestión sostenible'l territoriu, pu lu que tienen de sere estudios, reconocíos y sofitaos.

2.- Que los usos comunales tien síu clave pal caltenimientu la biodiversidá, paisaxes y ecosistemas n'Hespaña, asina cumu pa una bona xestión y caltenimientu los recursos, servicios y valores qu'algaman estos ecosistemas a la sociedad siendu estos modelos d'aproveitamientos y los sous procesos ecolóxicos imprescindibles pa desplicare la gran riqueza y diversidá del nuesu patrimoñu natural y cultural.

3.- Qu'en xeneral, esti patrimoñu común sufriera hestóricamente gran número d'agresiones. Esamortizaciones, usurpaciones, municipalización, alienaciones y la falta de reconocencia social, xurídica, llegal y alministrativa y las malas decisiones políticas, motivonun la perda irreparable d'un inmensu patrimoñu humanu, social, económicu, natural y cultural. Las agresiones sigen actualmente embaixu deillas formas pa rapuñare a las comunidaes llocales la xestión los usos comunales y los sous bienes asociaos.

4.- Que pesia estas agresiones, l'autitú hestórica de los beneficiarios y titulares de los usos comunales en defensa los sous dreichos, posibilítou que guei día, inda costituyan una forma usual, esitosa y estendida de gobernanza del nuesu patrimoñu natural y cultural. Montes en manu común, de socios, vecinales ou comunales, cofradías de pesca ou marisqueyu, xuntas de praos, de valle y vecinales, facerías, corrales de pesca, sociedaes de caza, acequias de careu, parzonerías, pedanías y outras formas de gobernanza xestionan deillos millones d'heutáreas cun altu valor natural, económicu y cultural siendu la espresión l'empoderamientu y participación de cienes de miles de ciudadanos na xestión participativa, direuta, resiliente y caltenible de los recursos llocales.

5.- Que se tien de reconocere, sofitare, promocionare y protexere caún los tres pilares básicos que carauterizan los usos comunales: **Comunidá, Gobernanza y Caltenimientu de la Naturaleza**, tal y cumu se diz na definición d'ICCA (Áreas Caltenidas pur Comunidaes Llocales) contemplada pur deillos muerganismos internacionales. Nesti sen, tien de prestase especial atención a preservare y promocionare los valores que, cumu norma xeneral, carauterizan los usos comunales y yes facen especialmente valiosos pa la sociedad, ente outros, los de la sostenibilidad, l'adautabilidad, la multifuncionalidá, la integración de valores culturales, el repartu equitativu los recursos y la xusticia social, la corresponsabilidad, los procesos participativos y l'empoderamientu las comunidaes llocales.

6.- Qu'importantes muerrganismos internacionales cumu'l Programa las Naciones Xunidas pal Meyu Ambiente (PNUMA), el Conveñu pa la Diversidá Biolóxica (CBD) ou la Xuniún Internacional pal Caltenimientu la Naturaleza (UICN) tán reconociendu, ca vuelta cun mayor énfasis, el papel cimeiru de las Áreas Caltenidas pur Comunidaes Llocales (ICCA) nel caltenimientu la naturaleza y la xestión sostenible de los recursos a nivel global. Ensín embargu, y pesia estu, n'Hespaña esiste una grave falta de reconocencia del sou valor dende las alministraciones públicas y una gran desconocencia pula parte la sociedad, nesti sen yía urxente reivindicare'l papel social, económicu y ambiental de las ICCA y el sou potencial pal caltenimientu y el desendolque'l mundu rural y la sociedad en xeneral.

7.- Que la salú y el rendimientu económicu, social y ambiental de los usos comunales dependen de las personas que yes xestionan y son los braeiros especialistas na sua gobernanza y furrulamientu. Estos homes y muyeres tienen de sere sofitaos socialmente pa poder sigire desendolcandu'l sou llabor nunas condiciones xustas. Poru, la sua participación nas decisiones polítiques qu'afeutan a los comunales yía imprescindible cul envís d'asegurare'l sou caltenimientu y sostenibilidad futura.

8.- Que, teniendu en cuenta tolu anterior, pa poder garantizare la supervivencia de la gran riqueza y variedá de formas de titularidá y xestión coleutiva esistentes n'Hespaña y poder desendolcare'l sou gran potencial y los sous valores asociaos, yía precisu fomentare nuevas lligazones y sinerxias, dende'l nivel llocal al global, basadas na participación de base, l'empoderamientu las comunidaes llocales y l'enfoque participatíu (“d'embaixu p'hacia enriba”). Pa eillu tien de prestase especial atención a l'establecimientu de canales de solidaridá recíproca ente las comunidaes que xestionan usos comunales, asina cumu l'establecimientu d'oxetivos comunes cun nuevos axentes sociales, cimeiramente nos campos d'investigación científica, el caltenimientu la naturaleza, l'ensíu, el dreichu y la comunicación. A lu qu'habría qu'añedire l'establecimientu d'una alianza ente los usos comunales y las comunidaes urbanas, que potencie los desemeyaos llazos que yes xunen.

9.- Qu'esiste una sólida base científica qu'amuesa, cumu norma xeneral, 1. tantu la contribución hestórica de los usos comunales a un desendolque más sostenible ya igualitariu, cumu 2. la sua importante contribución social, económica y ambiental n'actualidá, asina cumu 3. el sou potencial pal desendolque de ñiciativas que contribuyan a afrontare bona parte los desafíos sociales, ambientales y económicos qu'enfrenta la sociedad actual y las xeneraciones futuras. Nesti sen, consideramos especialmente destacable la llínea d'investigación abierta pula doutora Elinor Ostrom, Premio Nobel d'Economía en 2009, que demostró *“cúmu los bienes comunes pueden ser alministraos de xeitu efeutivu pur un grupu d'usuarios”*, rompiendu cuna dicotomía públicu/priváu al rescatare los valores la titularidá coleutiva, esmontandu asina la conceición tan aceutada, cumu n'ocasiones interesada, que la xestión la propiedá común tá condenada pula sua propia naturaleza al desastre.

10.- Que pulos motivos yá espuestos tien de sere una prioridá de las propias comunidaes comuneras, de las desemeyadas alministraciones y de la sociedad nel sou conxuntu, velare pula proteición y la reconocencia d'esi patrimoniu coleutivu en base a los principios de **inalienabilidad, indivisibilidad, imprescriptibilidad e inembargabilidad**, asina cumu garantizare'l respetu al dreichu escritu y consuetudinariu de las comunidaes, la sua plena reconocencia llegal, la sua plena capacidá xurídica na defensa y xestión los sous recursos y la participación adecuada los sous muérganos de gobernanza na toma decisiones qu'afeutan a esti patrimoniu. Nesti sen, las reformas llexislativas presentes y futuras tienen de respetare los dreichos hestóricos de las comunidaes locales y la sua autonomía na xestión del patrimoniu comunal. Asina mesmu los usos comunales y los sous bienes y dreichos asociaos tienen de sere xestionaos de xeitu participatíu y sostenible, cul envís de garantizare la tresmisión d'esti patrimoniu pal esfrute las xeneraciones futuras ensin menoscabu dalu nos sous valores económicos, sociales y ambientales.

Robrantes:



Mancomunidad de Montes Veciñais en Man Común de Castrove-Salnés



Federación Estatal de Pastores



MANCOMUNIDADE DE MONTES VECIÑAIS EN MAN COMÚN DO MORRAZO



Grupo de Estudos da Propiedade Comunal

Comunidade de Montes de Vilar de Triacastela